

四庫全書

集部

欽定四庫全書

聖祖仁皇帝御製文集卷九目錄

勅諭

諭內閣九卿詹事科道滿漢各官

諭大學士明珠李蔚尚書宋德宜左都御史魏  
象樞學士佛倫

諭大學士明珠

諭大學士明珠

諭吏部等衙門

諭大學士索額圖明珠戶部尚書伊桑阿

諭吏部等衙門

諭戶部侍郎薩木哈

諭九卿詹事科道

諭大學士索額圖明珠李蔚杜立德馮溥學士

噶爾圖佛倫希福頂景襄李天馥

諭九卿科道

諭護軍統領吳丹

諭大學士索額圖明珠李蔚馮溥學士噶爾圖

佛倫項景襄

諭禮部

諭刑部

諭大學士索額圖明珠李蔚杜立德馮溥學士

噶爾圖佛倫項景襄李天馥

諭康親王傑淑



欽定四庫全書

聖祖仁皇帝御製文集卷九

勅諭

諭內閣九卿詹事科道滿漢各官

茲者異常地震尔九卿大臣各官其意若何朕每念及甚為悚惕豈非皆由朕躬料理幾務未當大小臣工所行不公不法科道各官不直行叅奏無以仰合天意以致變生耶今朕躬力圖修省務期挽回

天意尔各官亦各宜洗滌肺腸公忠自矢痛改前非存  
心愛民為國且尔等自被任用以來家計頗已饒裕乃  
全無為國報効之心尔等所善之人即以為善而奏聞  
尔等所不合之人即不行奏請此等不公事情朕聞見  
最確欲即行處分猶望改過雖知之而不令議罪也今  
見所行愈加貪黷習以為常且從前遇此等災變之事  
朕亦屢曾申飭但在朕前云欽遵申飭之旨究竟全不  
奉行前此大奸大惡之人朕重加處分尔等亦所明知

此即榜樣也再科道各官向來於大奸大惡之人未見糾叅或因事體曖昧未有憑據難於舉發此後科道各官如有確見即行據實叅奏若依然虛飾如前所行奸惡巧為遮蓋不加省改或事情發覺或經朕訪出雖欲寬免國法具在決不饒恕著即傳諭齊集諸臣咸令知悉康熙十八年七月二十八日

諭大學士明珠李蔚尚書宋德宜左都御史魏象樞學士佛倫



地震示警災及軍民朕居高御物勤恤民隱遇茲變異  
惻怛彌殷其摧塌房屋壓傷人口惟恐五城御史不能  
逐戶細察止憑司坊官員總甲人等開報未盡詳確不  
得均霑實惠應分遣不在五城滿漢御史詳加稽察著  
都察院遵行康熙十八年七月二十八日

諭大學士明珠

地震傾倒民居朕心憫念至於窮苦兵丁出征在外房  
屋毀壞妻子露處無力修葺更堪惻然可勅該部行令

八旗各佐領下官員殷實者共相存恤出貲修助俾貧困之家早獲寧居該旗都統副都統叅領親行詳察毋致遺漏使窮苦之人妻子無棲息之所朕亦時加訪問若有玩忽該旗都統副都統叅領佐領驍騎校小撥什庫俱從重治罪康熙十八年七月二十八日

諭大學士明珠

茲因地震五城地方房屋傾頽貧苦小民不能補葺朕心特為軫念兩鄰十家戶有互相存恤之義可協助修

理如官紳富民願捐貲為貧民修理房屋者該管官酌量獎勵其令都察院行五城御史遵行康熙十八年七月二十八日

諭吏部等衙門

朕薄德寡識愆尤實多遭此地震大變中夜撫膺自思如臨冰淵兢惕悚惶益加修省仍宣布朕心使爾諸大臣總督巡撫司道有司各官咸共聞知務期洗心滌慮實意為國為民斯於國家有所裨益即爾等亦並受其

福庶幾

天和可致若仍虛文掩飾致負朕意詢訪得實決不為  
尔等姑容也一民生困苦已極而大臣長吏之家日益  
富饒民間情形雖未昭著近因家無衣食將子女入京  
賤鬻者不可勝數非其明驗乎此皆地方官吏諂媚上  
官苛派百姓總督巡撫司道又轉而餽送在京大臣以  
天生有限之物力民間易盡之脂膏盡歸貪吏私橐小  
民愁怨之氣上千

天和以致召水旱日食星變地震泉涸之異一大臣朋  
比徇私者甚多每遇會推選用時皆舉其平素往來交  
好之人但云辦事有能並不問其操守清正如此而謂  
不上干

天和者未之有也一用兵地方諸王將軍大臣於攻城  
克敵之時不思安民定難以立功名但志在肥己多掠  
占小民子女或借為通賊每將良民廬舍焚燬子女俘  
獲財物攘取名雖救民於水火實則陷民於水火之中

也如此有不上干

天和者乎一外官於民生疾苦不使上聞朝廷一切為  
民詔旨亦不使下達雖遇水旱災荒奏聞部覆或則蠲  
免錢糧分數或則給散銀米賑濟皆地方官吏苟且侵  
漁捏報虛數以致百姓不霑實惠是使窮民而益窮也  
如此有不上干

天和者乎一大小問刑官員將刑獄供招不行速結使  
良民久羈囹圄改造口供草率定案証據無憑枉坐人

罪其間又有衙門蠹役恐嚇索詐致一事而破數家之產如此有不上干

天和者乎一包衣下人及諸王貝勒大臣家人侵占小民生理所在指稱名色以網市利干預詞訟肆行非法有司不敢犯其鋒反行財賄甚且身為奴僕而鮮衣良馬遠勝仕宦之人如此貴賤倒置為害不淺以上數條事雖異而源則同總之大臣廉則總督巡撫有所畏憚不敢枉法以行私總督巡撫清正則屬下官吏操守自

潔雖有一二不肖有司亦必改心易慮不致大為民害  
此等事朕非不素知但以正在用兵之際每示寬容今  
上天屢垂警戒敢不昭布朕心嚴行誡飭以勉思共回  
天意作何立法嚴禁務期盡除積弊著九卿詹事科道  
會同詳議具奏特諭康熙十八年七月三十日

諭大學士索額圖明珠戶部尚書伊桑阿

官員兵丁房屋牆垣頃因地震塌毀甚多一時不能修  
葺四品官員以下原有半俸此一次仍行全給其明甲



撥什庫披甲當差人役錢糧併原增銀一兩著即支與  
兩月令其修理康熙十八年八月初二日

諭吏部等衙門

凡為臣子者同寅協恭自古皆然今各部院辦理事務  
大小漢官凡事推諉滿官事之得當則歸功於己如事  
失宜則却過於人至於入署不待事畢諉於滿官祇圖  
早歸宴會嬉遊不為國家盡力擔當料理公務自此以  
後各宜協力同心務盡厥職不可仍前推諉至科道各

官平日章奏內將一二可行之事隱附私情希圖作弊  
凡有條議鮮非無因閱覽奏疏多以已為至公至廉其  
囑託公事肆行妄為外播威勢挾制多端地方督撫等  
官莫不畏懼小民困苦未必不由於此作何懲戒著九  
卿詹事科道詳議具奏特諭康熙十八年八月十二日  
諭戶部侍郎薩木哈

通州三河等處地震災變壓傷人口無人收瘞殊為可  
憫戶工二部會同將旗下及民人房屋并各寺廟內有

見被壓埋者作何察明數目其速議具奏康熙十八年八月十八日

諭九卿詹事科道

自古設立臺省原係朝廷耳目之官上之則匡過陳善下之則激濁揚清務求知無不言言無不盡乃稱厥職近見直言讜論者不過幾人徇私好名者不可勝數朕自臨御以來略知此情每期言路諸臣化其偏私實陳得失輔登上理頃有以風聞請者試約略論之如今之

章奏已見施行者雖不明言為風聞何嘗不是風聞今  
若開風聞之條使言事者果能奉公無私知之既確言  
之當理即當數陳何必名為風聞方入告也儻生事之  
小人恃為可以風聞但知己之好惡必致擅作威福以  
行其私彼言之者既無確見聽之者安能問其是非故  
曰無稽之言勿聽弗詢之謀勿庸正所以誠言之無據  
謀之自專也況天下之大臣民之衆導之以理曉之以  
法待臣下須寬仁有容不因細事而即黜之所以體羣

工也用人則隨才器使無求全責備之心蓋以人材有不齊也若關天下之重朋黨徇私之情皆國家可參可言之大事不但科道而已有志之臣民槩可以言之何在區區風聞之言能斂戢奸貪之志氣哉治國家者有治人不患無治法爾康熙十八年八月二十六日

諭大學士索額圖明珠李蔚杜立德馮溥學士噶爾圖佛倫希福項景襄李天馥

自古帝王治天下之道因革損益期於盡善原無數百

年不弊之法果屬不可行者自應叅酌時宜歸於可久  
至於制度既定事可遵行不宜議論紛紜朝更夕改近  
閱章奏亦有不思事之可否但欲徒為更張或粗識數  
字即為大言準之事理殊屬茫昧如逞空言無補實用  
誰其不能且明末一切事例游移不定上無道揆下無  
法守以致淪亡此皆尔等所親見亦衆所共知今後凡  
條奏本章尔大學士等務加詳酌康熙十八年八月二  
十七日

諭九卿科道

今將科道兩衙門本章情弊無益國計民生之處一一講究卿等必有至公之衆論以佐朕意卿等但有所見即直言不可隱諱自古設立科道原係朝廷耳目之官務求知無不言言無不盡方稱其職今每見直言讜論者不過幾人徇私好名者不可勝數即如科道條陳一事部議妥確奉旨准行又有科道官言其不可者今日之所謂是明日又轉而為非朝更夕改部院至於督撫

有司不知今日之事或行二三日而即更或行數月而即更茫無成憲難取信於天下豈治道至理哉舉其大槩如舉才能一事是因人材不一有能理繁者有有操守者有練習其事者自古選賢任能治之大道與論俸不同其法未嘗不善即

世祖皇帝時亦曾有諭常行選擇之條偶有徇私作弊之人將不肖寡廉者薦之因一人而其法遂壞自朕親政以來如鹽差關差數行更換以後條陳不知又改幾



次也又如戶部銷算錢糧一事因督撫所報不合時價故部議駁回而科道輒有言者以為督撫地方大臣斷無虛估價值肥己行私凡有銷算皆不應駁查及部議徑准督撫之銷算不行再駁則科道又以督撫冒破錢糧一束草原價若干開銷若干一石豆原價若干開銷若干不特草豆為然凡馬匹等項事事皆有虛冒部中不行詳查槩聽督撫開銷以徇情面由此觀之部議不行駁回則以為徇督撫之私情駁回則以為督撫地方

大臣不宜疑其有所虛冒又恐衙役往來騷擾生事或  
應駭不應駭何者為是兩說俱無定論是皆大者餘悉  
難述康熙十八年八月二十九日

諭護軍統領吳丹

近者廣西南寧賊將軍吳世琮被誅湖南武岡州吳國  
柱亦已授首廣西湖南俱經投誠賊意懈弛賊兵潰散  
天下之人咸知賊勢必敗固不引領望諸將軍早清逆  
氛爾等陝西將士駐馬無傷斃人無疾病之地不思速

滅賊寇支吾推諉進取無期又有何人代為尔等破賊  
耶尔在朕左右稔知朕意應勇果任事參贊大將軍機  
宜以立功勲頃大將軍稱言來京陛見面奏軍國大事  
比至陳奏並無成算有失衆望此固軍前將士所悉知  
也若失此機會可乘之時萬一賊據四川貴州雲南以  
為巢穴致歲月相持彼時悔無及矣宜速行籌畫特諭  
康熙十八年九月初九日

諭大學士索額圖明珠李蔚馮溥學士噶爾圖佛

倫項景襄

今聞錢法漸弛鼓鑄收銅等項滋生弊端以致制錢日少價值騰貴著戶工二部都察院堂官同詣錢局親察每鑄錢一文必重一錢應作何釐剔弊端俾制錢充裕永可遵行著徹底確察逐一定議具奏至於部院衙門各處所有廢銅器皿毀壞銅鐘及廢紅衣大小銅砲并直隸各省所存廢紅衣大小銅砲著盡行確察解部鼓鑄康熙十八年九月十三日

諭禮部

前以地震示警朕恐懼修省夙夜靡寧已經遣官虔告郊壇乃精誠未達迄今時復震動未已朕心益用悚惕茲當虔誠齋戒躬詣

天壇親行祈禱爾部即擇期具儀來奏特諭康熙十八年九月十三日

諭刑部

國家設立法制原以禁暴止奸安全良善故律例繁簡

因時制宜總期合於古帝王欽恤民命之意向因人心  
滋偽輕視法網及強暴之徒凌虐小民故於定律之外  
復嚴設條例俾其畏而知警免罹刑辟乃近來犯法者  
多而奸宄未見衰止人命關係重大朕心深用惻然其  
定律之外所有條例如罪不至死而新例議死或情罪  
原輕而新例過嚴者應去應存著九卿詹事科道會同  
詳加酌定確議具奏特諭康熙十八年九月十四日

諭大學士索額圖明珠李蔚杜立德馮溥學士噶

爾圖佛倫項景襄李天馥

地震以來修葺破壞工費甚多時值用兵軍需孔亟度支浩繁各處工役或有遲延浮冒侵蝕等弊除

奉先殿皇太子宫并總管內務府監造工程外其各處修造著都察院逐一詳察康熙十八年十月十五日


諭康親王傑淑

自數年用兵以來所費錢糧不貲以致民力疲困今大破湖南賊寇餘孽遁入雲貴扼據險要抵死支持其勢

旦夕殄滅惟福建海賊竊踞海澄倚金門廈門為營窟  
騎兵無所用其力惟藉水師樓櫓攻取甚屬緊要王等  
曾言今歲賀蘭國船隻若到於八月內進攻海寇儻賀  
蘭國船隻愆期當內徙邊海人民堅壁清野以待其困  
今歲因賀蘭國之船未至故前議不行近者福建綠旗  
兵丁較取廈門金門時漸增數倍即無滿兵止以綠旗  
兵丁剿滅賊寇未為不足現在福建滿兵甚多應即掣  
一半以省糧餉以甦民力但耿精忠尚在閩中虞有意



外之變故暫為停止朕思即令精忠來京此輩惶恐疑  
畏或生他故如留精忠在彼王親率滿兵一半回京似  
屬不可設必候諸處底定則福建需用糧餉較之他省  
不啻什百為今之計王當開諭耿精忠令其陳奏請安  
詣京陛見儻精忠因王之言具疏止可令其自來若精  
忠未能即行王獨率滿兵一半先回則勢更有所不可  
也此事關係甚為重大王當詳細籌畫具奏特諭康熙  
十八年十月二十三日



聖祖仁皇帝御製文集卷九

欽定四庫全書

集部

聖祖仁皇帝御製文集卷十二

臣永瑤恭校

侍讀臣孫球覆勘

覆校官中書臣施光輅

校對官中書臣王鍾泰

謄錄舉人臣邵颿

謄錄舉人臣沈一鶚

欽定四庫全書

聖祖仁皇帝御製文集卷十目錄

勅諭

諭戶部

諭禮部

諭九卿詹事科道

諭康親王傑淑

諭大將軍安親王岳樂

諭九卿

諭大學士索額圖明珠李蔚杜立德馮溥

諭戶部

諭戶部尚書伊桑阿

諭大學士索額圖勒德洪明珠李蔚杜立德馮

溥學士噶爾圖希福徐元文李天馥

諭大學士索額圖

諭刑部

諭吏兵二部

諭吏部

諭禮部

諭吏部等衙門

諭大學士勒德洪明珠李蔚杜立德

諭內閣九卿詹事科道

諭恪純長公主

諭大學士索額圖勒德洪明珠李蔚杜立德學

士噶爾圖希福李天馥



欽定四庫全書

聖祖仁皇帝御製文集卷十

勅諭

諭戶部

前者大兵進剿四川已破朝天等關直至保寧恢復在  
邇因周有德張德地席普臣駐劄廣元不將糧餉極力  
轉送軍前陝西總督巡撫亦不將糧餉極力運送以致  
大兵糧餉不繼難於久駐遂爾退回貽誤軍機關係重

大此數年以來使逆賊逋誅封疆未復兵民苦累休養無期皆周有德張德地席普臣陝西總督巡撫怠玩遲延之故每念及此深可痛恨目今大兵分路進取已經恢復漢中府不日前抵蜀疆相機剿撫底定可期軍前糧餉最為緊要著陝西總督巡撫大小文官殫心料理設法運送務令兵食無匱士馬飽騰早奏捷功以副朕定亂安民至意如該督撫等官漫不經心泄泄從事致糧餉缺之有誤軍機將督撫以下誤餉之官俱以軍法

從事決不饒恕尔部即速為傳諭遵行特諭康熙十八年十一月初十日

諭禮部

本月初三日太和殿災變出非常朕心深切警惕茲欲詔告天下尔部即擇期具儀以聞特諭康熙十八年十二月初五日

諭九卿詹事科道

君臣誼均一體分勢雖懸而情意不隔安危欣戚無不

可相告語者堂陛之義固宜如是也邇者朕體初平忽遇殿廷不戒被燬於火爾諸臣因朕偶恙復睹此災愛主心切必謂朕當過於憂慮朕披閱經史頗明大道朕之一身上受

祖宗之付託下繫臣民之瞻仰為任匪輕寧不自愛惟是今秋有地震之變又各處饑饉洊臻寇盜未息此朕早作夜思中心惶懼寢食靡寧者至於殿廷告災乃上天致警敢不夙夜祗畏循省厥愆然其所關止屬朕

躬臨御之所但得海宇清宴置斯民於衽席之上則朕  
今所居較諸前代茅茨土階尚或過矣豈至以露處為  
慮哉朕自五齡即知讀書八齡踐阼統蒞萬方

太皇太后嘗問朕何欲朕敬對曰臣無他欲惟願天下  
乂安生民樂業共享太平之福而已當時左右實共聞  
之自茲迄今謹持此心兢兢業業恒如一日可以質諸  
寤寐儻有政治失宜皆朕躬之咎從不諉過臣下惓惓  
之意茲與爾等悉之特諭康熙十八年十二月初六日

諭康親王傑淑

王所奏據實指叅事已經覽悉朕思凡行一事必前後計慮果有裨於國家始可舉行若輕率妄動必致舛錯今廣西湖南漢中興安等處俱已底定逆賊餘黨引領以冀歸正者不止百十若將耿精忠即行正法不但已經投誠之人以為後日亦必如此聲明其罪即未經投誠之人覩此寒心亦未可知關係實重前朕手諭欲令耿精忠來京者蓋掣回福建一半滿兵之意非使即行

處決俾王先來也如王善能勸諭令至京師諸事皆得  
平妥王但當加意開導之不可輕舉彼如必不赴京再  
行詳密奏候旨特諭康熙十九年正月初六日

諭大將軍安親王岳樂

褒德賞功國家之令典安內攘外社稷之崇勲王連年  
以來遠蒞巖疆親經百戰擲風沐雨厯暑逾寒競揚貔  
武之雄克清梟獍之孽湖湘諸處已見蕩平滇黔餘氛  
俱成坐困更體朕軫念窮荒之心廣示招徠深加撫恤

王師所至遐邇來歸捷奏屢宣中外稱慶朕既嘉碩畫  
益篤親親爰命班師副朕懷想頃者聞王已抵武昌奏  
凱可期特遣使臣慰勞兼賜駱駝良馬以示優眷王其  
按程而來朕將計日以待特諭康熙十九年正月二十  
一日

諭九卿

科道官內陞外轉原以示勸懲也今見才優者猶知憚  
於外轉其或才力不及不稱言職之人安於外轉道員



者甚多是但以示勸非所以示懲也故令九卿詹事科  
道會議務期得當魏象樞等奏稱恐天下不肖之輩不  
識朝廷慎重道員之意疑為厭薄言路之端等語邇年  
以來姚文然李之芳施維翰等內陞未久即任以大僚  
督撫亦因其克盡言職才能素著之故也此無論天下  
智愚不肖當亦知朝廷無厭薄言路之意矣其外轉者  
或係素無建白或係昧於事理或係任臆妄言或係才  
力不及原非因其條奏而外轉也又稱近年外轉之科

道並無貪污溺職之一人而五部郎中俸深陞道如范永茂高恒豫盧元培程汝璞等賊私累累劣蹟彰彰者不知凡幾等語科道外轉者豈並無溺職之一人乎五部俸深陞道員者甚多豈盡係貪劣之人乎如陳丹赤等優者匿而不言獨舉范永茂等四人不辨賢否而槩言之可乎魏象樞去歲七月內曾於朕前面奏科道官所行皆係徇私有負朝廷耳目之任罪皆應死今甫數月復言歷年外轉者並無溺職之一人前後參差何其

速耶爾等所奏理不宜批答因註語內有以存國體之語故令諸臣知之至若外轉科道以小品官員用遂至有傷國體朕殊不解故特諭諸臣示以朕意康熙十九年正月二十一日

諭大學士索額圖明珠李蔚杜立德馮溥

雲南貴州係邊疆重地苗民雜處總督關係最為緊要必得才謀超衆之人方克勝任將軍趙良棟勇略甚著操守清廉雖係武弁通達文義著改授雲貴總督仍兼

將軍必能蕩平地方撫輯兵民著議政王大臣九卿詹事科道官員會議具奏康熙十九年正月二十九日

諭戶部

前因各省地方多有饑饉已經遣官賑濟今見京師附近之地四方饑民流移在道朕心深為憫惻若不急行安插令其得所將來必至鬻賣子女難以生全作何設法令其各歸原籍著該地方官加意撫綏安集復業以免流離著九卿詹事科道詳議具奏特諭康熙十九年

二月初七日

諭戶部尚書伊桑阿

朕聞宣府等處歲值大祲吾民乏食鬻賣妻子以自求  
活夫人孰不愛其室家哉至欲延一朝夕之命割其所  
親憫惻莫甚焉其遣尔部郎中明格禮馳驛速往會同  
地方官賑濟急拯艱厄以紓朕懷康熙十九年二月二  
十六日

諭大學士索額圖勒德洪明珠李蔚杜立德馮溥

學士噶爾圖希福徐元文李天馥

頃者年復不登饑民就食多聚京師故令增設各廠煮糜救饑今四方失業之民聞而來者愈衆反致流離道路有轉徙溝壑之虞且天氣漸向炎熱老幼羸弱聚之蒸為疾疫轉益災沴朕甚憂焉作何設法令其各歸原籍不致失所仍令各該地方官拊循周恤毋致流移饑民內有疾疫死亡者令五城作何給以藥餌醫治拯救去歲三冬無雪今春無雨刑獄淹禁恐有冤抑應即行

清理乞食饑民向不許入裏城今應聽其出入用兵地方殉難諸臣卹典原候事平定議今應即與舉行陰陽不和盖由人事失當思欲感通未得其方以上數事皆朕意念所及尔等會同尚書侍郎左都御史副都御史詳議具奏尔等國之大臣所宜極慮深思以答委任應行應革關切時務者其各抒所見一併議聞康熙十九年四月初一日

諭大學士索額圖

五城賑濟饑民可各將姓名籍貫問明造冊交與總理賑濟僉都御史高爾位彙送戶部康熙十九年四月初

一日

諭刑部

去歲三冬無雪今春雨澤愆期天氣亢暘農事可慮朕念切民瘼夙夜焦勞或因刑獄淹禁中有冤枉致干

天和亦未可知茲特遣明珠杜立德希福李天馥等會同三法司將已結重案逐一詳加審鞠如有罪可矜疑



者即與察明事由開列具奏務期情法允協有枉必伸以副朕欽恤獄讞至意康熙十九年四月初二日

諭吏兵二部

自吳逆叛亂以來各用兵地方文武官員有矢志忠貞克篤臣誼抗賊不屈捐軀殉難者幽忠難泯大節可風彼時即宜錫以卹典但以各處尚未蕩平其中有情節未確者有應行察者有正在招撫未便遽行者不得已而緩至今日朕每念及深為惻然茲各路會剿大勢底

定餘氛指日殲滅其殉難各官應加褒卹以慰忠魂尔等即詳察議奏特諭康熙十九年四月初三日

諭吏部

朕萬幾之暇留心經史雖遜志時敏夙夜孜孜而研究闡發良資講幄之功日講起居注各官俱以學行優長簡備顧問講解明晰奉職勤勞所纂講義典確精詳深裨治理侍讀學士張英供奉內廷日侍左右恪恭匪懈勤慎可嘉高士奇杜訥學問淹通居職勤慎供奉有年

應授為翰林官尔部俱一併從優議叙具奏以後著益  
殫心職業佐助典學以副朕崇儒重道稽古右文至意  
特諭康熙十九年四月初八日

### 諭禮部

農務為國家之本粒食乃兆姓所資必雨暘時若而後  
秋成可期自去冬以來雨雪未降今時已入夏甘霖尚  
稽久旱傷麥秋種未布農事深為可虞且失業之民饑  
饉流移尤堪憫惻或因政治未協致干

天和朕用是夙夜靡寧循省愷惕茲當虔誠齋戒躬詣  
天壇親行祈禱為民請命尔部即擇吉具儀來奏康熙  
十九年四月十一日

諭吏部等衙門

致治安民之道首在懲戒貪蠹嚴禁科派而後積弊可  
清問閭不擾近見街道衙門蠹役詐索害民又聞提督  
步兵衙門五城司坊街道巡捕營等衙門各官不能潔  
已奉公恪遵法紀縱容衙役朘削小民或沿習陋規科

斂行戶或借端挾詐官役分肥肆意橫行無辜受害種種弊端深可痛恨向來雖經嚴禁定有處分之例但恐小民未能悉知仍被奸徒擾害應再加嚴飭務令家喻戶曉以副朕安全生民至意著各該衙門通行曉諭遵行特諭康熙十九年五月初二日

諭大學士勒德洪明珠李蔚杜立德

向以亢暘齋居虔禱雖雨澤薄降四野田疇尚未霑足今茲不雨為時又久旱魃為災朕甚懼焉意者政事之

失宜者多歟不然天心仁愛下民何其宜雨而久不雨也日者以政理之故勤求言矣而言者文繁無益其集九卿詹事科道掌印不掌印各官問今有何事當行何事當革悉意以陳毋有所隱康熙十九年五月十五日

諭內閣九卿詹事科道

朝廷致治惟在端本澄源臣子服官首宜奉公杜弊大臣為小臣之表率京官乃外吏之觀型大法則小廉源清則流潔此從來不易之理如大臣果能精白乃心恪

遵法紀勤修職業公爾忘私小臣自有所顧畏不敢妄  
行在外督撫各官自應慎守功令潔已愛民乃大臣等  
每自謂清正無私粉飾空言至其所行往往營私作弊  
有玷官方深負委任之意科道係耳目之官凡有弊端  
自當據實叅奏且居處甚近如此情弊豈無見聞乃瞻  
徇情面緘默不言即有條奏多係繁文官職掌殊為  
未盡如肯從公糾舉孰敢恣行無忌朕以為目今之弊  
莫大於此近因天氣亢旱朕夙夜焦思念慮所及無不

舉行感格之道猶恐未盡故特召尔等各面陳所見因宣諭朕意令尔等知之康熙十九年五月十五日

諭恪純長公主

公主被反叛所累屢年困頓朕每念及未嘗不為惻然不意深染時症遣乳媪暨親近侍衛往視及回轉奏公主之語不勝感歎又聞病勢危篤即命該部院衙門將服飾執事等項星夜製辦今公主體中大愈將此各項盡送公主處以示朕惓惓注念之意但慮製辦期迫不



甚佳耳康熙十九年六月初七日

諭大學士索額圖勒德洪明珠李蔚杜立德學士

噶爾圖希福李天馥

凡試職官員一年果係稱職者方准實授其未能稱職者或仍令再試或作何另用著吏部定例議奏康熙十九年六月二十日

聖祖仁皇帝御製文集卷十

欽定四庫全書

聖祖仁皇帝御製文集卷十一目錄

勅諭

諭大學士勒德洪明珠李蔚杜立德馮溥

諭翰林院掌院學士庫勒納等

諭侍郎宜昌阿

諭兵部

諭盛京將軍安褚護

諭吏部

諭三法司

諭翰林院

諭吏部都察院

諭都察院

諭大學士明珠

諭大學士明珠

諭戶部

諭戶部

諭大學士勒德洪明珠李蔚馮溥學士噶爾圖

希福格爾古德李光地張玉書

諭戶部

諭禮部

諭侍講高士奇

諭兵部

諭吏兵二部

諭戶部

諭戶部

諭大學士勒德洪明珠

諭禮部

諭戶部尚書伊桑阿侍郎額庫禮

諭禮部

諭吏兵二部

諭禮部

諭奉天將軍安褚護

欽定四庫全書

聖祖仁皇帝御製文集  
卷十一目錄



欽定四庫全書

聖祖仁皇帝御製文集卷十一

勅諭

諭大學士勒德洪明珠李蔚杜立德馮溥

朕萬幾餘暇留心經史時取古人墨蹟臨摹雖好慕不衰未窺其堂奧歲月既深偶成卷軸卿等佐理勤勞朝夕問對因思古之君臣美惡皆可相勸故以平日所書者賜卿方將勉所未逮非謂書法已工也卿等其知朕

意康熙十九年六月二十七日

諭翰林院掌院學士庫勒納等

卿等日侍講筵夙夜匪懈啓沃之暇每以朕書為請朕  
萬幾餘閒時取古人墨蹟臨摹雖好慕不衰寶未窺其  
堂奧何可示人卿等既為文學侍從之臣即有成就德  
業之責故因所請輒以頒賜朕意其悉之康熙十九年  
六月二十七日

諭侍郎宜昌阿

尔等所行事宜俱各得當甚為嘉悅朕意所及數事特  
行密諭一尚之信雖經犯法伊等妻子不可令卑賤小  
人凌辱應查明嚴禁遣人護送來京一廣東所有大市  
小市之利經藩下諸人霸占者無算可會同巡撫詳察  
應歸百姓者題明仍歸百姓則廣東人民得霑無窮之  
惠矣一聞藩下所屬私市私稅每歲所獲銀兩不下數  
百萬當盡充國賦以濟軍需一各省商販人等欲藉藩  
下行勢投入者甚多皆須查明應斷出者即行斷出其

不應斷出者宜盡行遣發來京勿致逃亡隱漏一尚之  
信等所有銀兩盡行查明用充軍餉已有諭旨務須詳  
行稽查毋致有遺漏侵剋等弊康熙十九年八月三十  
日

諭兵部

目今四方悉已蕩平惟滇黔餘孽尚未殄滅前經會議  
各路官兵俱於八月內進剿茲師期已屆士馬飽騰正  
宜分路竝進奮勇長驅埽除殘寇以靖地方尔部作速

傳諭湖南四川廣西大將軍將軍督撫提鎮等官整棚  
兵馬星馳進剿勿得借端推諉耽延時日有逗留不前  
者即行重處又聞各處綠旗兵丁將帥不恤軍士令其  
為滿洲大兵蓋房割草餵馬及私行役使恣意虐害以  
致兵丁苦累如桑格標兵潛逃一千有餘皆由於此不  
思為將者與士卒甘苦相同加意愛養方可責其用命  
今因恤卒伍惟便私圖貽誤軍機深為可惡尔部即通  
加嚴飭以後有仍蹈前轍者即行察叅從重治罪特諭

康熙十九年閏八月初九日

諭盛京將軍安褚護

自古身任封疆節鉞重臣不避小人疑忌惟計有益於國有利於民耳為君者視其事之可否折衷而行之未嘗偏執意見過寬過猛也凡事不一有創始則難行之久而乃定者有自始至終不可變易者有現行似乎未便而日後稱便者有目前行之雖善久而弊生者固不可執一而論也據尔奏疏所稱請發嚴旨將尔原議欲

行鹽引乃又不能禁戢兵丁以致搶掠衆怨沸騰未經  
陳奏等處一併聲明從重處分等語朕旨昭如日星設  
無明白實據所係匪輕今若如尔等所請遂有議處之  
旨是無實據何以服人又疏稱凡闕鹽法諸犯盡行赦  
宥領引諸商盡行革除被搶諸物交與盛京刑部酌量  
令其賠補則遼東諸人咸戴皇恩如天如日等語但差  
往大臣察審將竣是非常有定論正水落石出黑白分  
明之時矣無故遽改前旨恐衆意以為法令更張厭苦

煩擾致生疑惑難與遵行將軍所奏雖是此事結案在  
邇不便更有諭旨茲因將軍密陳故不逐款批答擇其  
要者將大意手草密諭康熙十九年九月初六日

諭吏部

言官職司耳目必學識優長練達政務乃克勝任近以  
科臣孫纘條奏行取考選應加考試因將見任科道各  
官俱行親試觀其才品以昭澄敘姚締虞王曰溫李迥  
條奏詳明可稱言職并張鵬等俱著留任其益加勉勵



殫心職業以副任用傳廷俊和鹽鼎孫纘才識庸常不稱言職俱著降三級調用不准以加級紀錄抵銷尔部即遵諭行特諭康熙十九年十月二十日

### 諭三法司

帝王以德化民以刑弼教莫不敬慎庶獄刑期無刑故獻決之司所關最重必聽斷明允擬議持平乃能使民無冤抑可幾刑措之風近覽法司章奏議決重犯甚為繁多愚民無知身陷法網或由教化未敷或為饑寒所

迫以致習俗日偷懲不畏法每念及此深為憫惻在外  
督撫臬司及問刑各官審理重案有律例未諳定擬失  
當草率完結者有膠執成見改竄供招深文羅織者有  
偏私索詐受囑徇情顛倒是非者有一於此民枉何由  
得伸以後著嚴加申飭內外大小問刑各衙門洗心滌  
慮持廉秉公凡問理刑名務期原情準法協於至當不  
得故縱市恩亦不得苛刻失入痛改積習加意祥刑以  
副朕尚德好生欽恤民命至意特諭康熙二十年正月

二十八日

諭翰林院

日講官敷陳經史日侍顧問贊襄典學職務繁多宜廣其員以彰右文之治見在滿官足用漢官尚宜增添著即開列應用各員職名具奏康熙二十年正月二十八日

諭吏部都察院

國家設官分職各有專司必勤勵辦事乃克勝任近見

各衙門官員有虛糜俸祿懶惰不上衙門者有老疾孱弱不能任事者應分別勤惰以示勸懲堂上官員爾等開列具奏所屬官員會同各該堂官分別議奏康熙二十年正月二十八日

諭都察院

祭祀以承上下神祇理宜敬慎近見陪祭各官跡涉慢易班行不整笑語自如殊失執事有恪之道爾衙門職在察劾未見指名叅奏所司何事其嚴飭之康熙二十

年正月二十八日

諭大學士明珠

太皇太后駕幸湯泉頤養甚宜起居萬安朕體佳善扈從諸臣亦皆安好聞在京新滿洲患病者多朕在內時賜醫調理常奏速愈今者無人照看此後上三旗新滿洲有抱病者爾須不時詢問即傳旨令在內良醫調治便中時將患病與全愈之人明白奏聞爾身佳否為此特諭康熙二十年四月初五日

諭大學士明珠

朕聞京城左右亢旱農事堪憂爾可傳諭禮部著行祈雨再傳諭內務府總管噶祿照前祈雨例於西山等處虔行致禱朕體甚佳皇長子亦安爾近佳否為此特諭康熙二十年四月二十二日

諭戶部

比年以来宣府大同疊罹饑饉而邊外蒙古亦復凶荒故發宣大存貯米石盡用賑濟朕思邊境糧儲所關最

要古稱九年六年之蓄蓋合侯甸藩畿通為之計豈僅  
謂公廩之充盈已也養人足食道貴變通可發京倉米  
二十萬石前運宣大備用其運送米石用就近地方驛  
站車夫不致糜費尔部核議具奏康熙二十年五月初  
十日

諭戶部

宣府太原大同等處近罹災傷人民困苦所徵房號銀  
兩應與除免尔部議奏康熙二十年五月十二日

諭大學士勒德洪明珠李蔚馮溥學士噶爾圖希  
福格爾古德李光地張玉書

聞蘇尼忒人所有米糧止能支至六月應預運米或數  
千石或萬石送至宣府備用其運送米石著用兵部馬  
車并大內以下八分公以上酌捐車輛大臣等亦捐車  
輛速運爾衙門會同戶兵二部議奏康熙二十年五月  
二十五日

諭戶部



前因大同等處地方自去歲饑荒百姓無食流離失所  
已經發銀二十萬兩遣官賑濟又將應徵房稅悉與豁  
除務期小民家室復完不失故業今復差官各處察看  
閭閻尚多逃亡田土仍然荒棄耕種無資衣食奚賴朕  
心深為憫惻所有本年應徵地丁各項正賦并歷年帶  
徵拖欠錢糧盡行蠲免但小民困苦已極猶恐無濟目  
前此外有何應行事宜可以速拯災黎俾得存活者尔  
部即行詳議具奏以副朕軫恤百姓至意特諭康熙二

十年五月二十七日

諭禮部

奉聖夫人朴氏保育

先皇恭勤克著護朕冲幼淑惠彌昭提抱之殷靡間於  
夙夜思勤之篤久歷夫歲時朕眷念前勞已錫封典茲  
聞奄逝軫悼良深應得恩卹宜從優厚尔部即詳察定  
例具奏特諭康熙二十年六月十五日

諭侍講高士奇

尔在内以来勤慎盡誠夙夜匪懈近日聞尔偶得暑病  
朕甚憫之每日問醫方知少痊茲特遣内使往視并賜  
頤養之資尔當安慰自怡省思慮專精神輔以醫藥可  
也特諭康熙二十年六月二十七日

諭兵部

在外武職官員有未經從逆効力行間勤勞日久者枕  
戈臥甲躬冒矢石建立功績雖經敘錄加銜加級但不  
能即補實缺仍留該標投閒置散虛糜歲月或赴部候

補又因無缺守候遲延資斧匱乏俱深可憫此等軍前効力之人應令本身赴部驗明原劄即行推補其作何錄用尔部確議具奏特諭康熙二十年七月十七日

諭吏兵二部

大同地方連年旱荒百姓困苦以致流離失所就食他方因而田地荒蕪生計不遂今已屢行賑濟蠲免各項錢糧又聞雨澤霑足秋成有望但饑饉之後安養生全必須廉能官吏方克加意招徠留心撫字見任府州縣

衛所等官貪劣不職者照常叅處外其才具平常者該撫酌量更調本省簡僻之缺仍於通省見任官員內選擇清廉愛民者調補大同所屬地方若果撫循有能戶口充實田地開墾著有成效該撫特行舉薦該部從優敘錄以副朕獎勵循良愛養百姓至意爾等即遵諭行特諭康熙二十年七月二十二日

諭戶部

積貯為國家大計歲運漕米充實京倉最為緊要旗丁

人等輓運勤勞宜加存恤朕頃巡行近畿至通惠河一帶見南來漕艘旗甲人丁資用艱難生計窘迫深為可憫若不預為籌畫恐其苦累難支以致沿途遲滯貽悞倉儲所關匪細前以軍需浩繁漕運額設錢糧節經裁減今應作何酌復款項爾部詳議具奏特諭康熙二十九年九月二十日

諭戶部

頃者朕巡行近畿至霸州地方見其田畝窪下多遭水

患小民生計無資何以供納正賦其該州見在被淹田地應徵本年錢糧著察明酌量蠲免以示朕勤恤民隱至意尔部即遵諭行特諭康熙二十年九月二十日

諭大學士勒德洪明珠

漕運遲速關京庾盈詘國用之本也今年糧船稽滯逾期勢必守凍明歲漕運恐致後時朕思臨清德州見有倉座欲將後幫米石分貯彼地速令空船南回明年著用山東河南船隻發所貯臨德諸倉之米轉運抵通庶

今年漕艘得以早歸而明歲輓輸可無貽悞尔等同戶部及倉場侍郎會議具奏康熙二十年九月二十日

諭禮部

古帝王敦重倫常推恩勲戚生則被以顯榮沒則必存優卹歷稽前代舊典昭然今仁孝皇后之父領侍衛內大臣公噶布喇簪纓世裔宣力累朝恭謹持身忠勤奉職忽聞奄逝深軫朕懷應作何恩卹著察例從優議奏特諭康熙二十年九月二十二日



諭戶部尚書伊桑阿侍郎額庫禮

今歲漕船必致守凍運船旗丁悉係南人既貧苦可念  
又北地寒冷非其所習應作何處置不致有饑寒之累  
爾部議奏康熙二十年十月初七日

諭禮部

朕恭奉

聖祖母太皇太后慈諭自古帝王慎簡淑德備秩宮闈  
以襄內政歷稽往制典禮攸隆貴妃佟氏溫惠端良壺

儀茂著今進封為皇貴妃鈕祜盧氏恭和淑慧令範克  
昭令冊封為貴妃惠嬪納喇氏宜嬪郭羅洛氏德嬪吳  
雅氏榮嬪馬佳氏秉質柔嘉恪勤內職今進封惠嬪為  
惠妃宜嬪為宜妃德嬪為德妃榮嬪為榮妃尔部即選  
擇吉期開列儀注具奏特諭康熙二十年十月二十五  
日

諭吏兵二部

總督哈占蔡毓榮統領官兵進剿逆賊直抵雲貴地方

著有勞績其所草原官俱准復還尔部即遵諭行特諭  
康熙二十年十一月初七日

諭禮部

逆賊吳三桂背恩反叛煽亂地方罪惡貫盈已服冥殛  
逆孽世璠敗遁雲南竊據省城今大將軍貝子章泰等  
遵奉成命統兵進剿世璠窘迫自刎逆黨咸伏厥辜偽  
官軍民人等草心來歸疆域大定念數年以來大兵征  
剿士卒勞頓轉運糧餉民生困苦今逋寇既已蕩平兵

民得以休息此皆仰荷

天地

祖宗眷佑已命行

告祭禮仍應布告中外與民更始以昭維新之化爾部  
即擇吉具儀來奏特諭康熙二十年十二月初五日

諭奉天將軍安褚護

今雲南等處俱已底定海寓清平告祭

天地

太廟

社稷畢即於

陵寢行告祭禮盛京者

祖宗開創根本重地朕時思念不忘今值天下宴安意欲躬詣

山陵告祭前幸盛京時未至

永陵致奠迄今尚歉於懷茲若果往當身歷其處仰瞻祖宗發祥舊址尔可密遣副都統穆泰暨賢能官員將

所行塗程與駐蹕及應行之處自興京通烏喇徑路詳  
看繪圖於同往章京內擇通曉者一員來奏恐踏看未  
周不能詳記道里山川也因無定期未行明示若俟定  
後商酌恐不及矣故爾密諭將軍身體佳否康熙二十  
年十二月初八日

聖祖仁皇帝御製文集卷十一

欽定四庫全書

聖祖仁皇帝御製文集卷十二目錄

勅諭

諭大學士勒德洪明珠李蔚學士格爾古德阿  
蘭泰石柱王守才張玉書

諭大學士勒德洪明珠李蔚馮溥尚書伊桑阿  
郭四海左都御史徐元文侍郎李天馥杜臻  
學士噶爾圖格爾古德阿蘭泰石柱王守才

李光地張玉書

諭議政王大臣

諭大學士杜立德

諭禮部

諭將軍安褚護

諭烏喇將軍巴海等

諭學士張英

諭裕親王福全



諭蘇大敦柱

諭戶刑二部

諭裕親王福全

諭裕親王福全

諭敦柱蘇大

諭刑部

諭戶兵工三部

--	--	--	--	--	--	--	--

欽定四庫全書

聖祖仁皇帝御製文集卷十二

勅諭

諭大學士勒德洪明珠李蔚學士格爾古德阿蘭  
泰石柱王守才張玉書

賞罰乃國家之大柄忠逆實臣節之大防從古帝王敷  
治戡亂未有忠不賞而逆不罰者但其中情有輕重故  
法有寬嚴必功罪分明予奪精確始稱允協前總兵官

王永清身膺重任甘心從賊及大兵抵滇圍困省城為日甚久猶不歸順乃與夏國相隨在奔竄追計無復之始來投誠故拏禁其子封其家產今文武官員見在雲南仍不投順者可察出如王永清之例一併封拏其應作何結案曾經議政王等議俟雲南省城克復之後再議今議此案時應將從賊受職歸順後未經定議官員品秩稍大者通行察出具奏其從賊官員前已歸順曾經奉旨從寬免罪者不必槩行察議此內有原為大吏

覲顏從逆又受偽職者名節棄滅大玷人臣之誼若輩不合仍令居官應俱革任著議奏儻其間有効力真確功績甚著之人應酌量留任仍於各名下明白開注勞績見在候缺者俱停其錄用至明歲以後文武各官舉行大計軍政凡屬從賊受職歸順者俟督撫提鎮開造計冊到日吏兵二部應行察明罷黜著議政王貝勒大臣會議具奏康熙二十年十二月初九日

諭大學士勒德洪明珠李蔚馮溥尚書伊桑阿郭

四海左都御史徐元文侍郎李天馥杜臻學士噶爾圖格爾古德阿蘭泰石柱王守才李光地張玉書

頃九卿等以逆首既除四方底定奏請上朕尊號朕自御極以來日夜孜孜以乂安民生為念乃逆賊吳三桂一倡變亂遂至塗炭八年當吳三桂初叛時散布偽劄煽惑人心各省兵民相率背叛此皆德澤素未孚洽吏治不能剔釐所致幸賴

上天眷佑

祖宗威靈滿洲兵士之力逆渠授首奸黨悉除地方平靖獨念數年之中水旱頻仍災異疊見師旅疲於征調被創者未起閭閻敝於轉運困苦者未甦且因軍興不給裁減官員俸祿及各項錢糧竝增加各項銀兩仍未復舊每一軫念甚歎於懷若大小臣工人人廉潔俾生民得所風俗淳厚教化振興天下共享太平之福雖不上朕尊號令名實多如一切政治不能修舉則上尊號

何益朕斷不受此虛名也朕自幼讀書覽古人君行事  
始終一轍者甚少嘗以為戒惟恐幾務或曠鮮克有終  
以故宵衣旰食祁寒盛暑不敢少間偶有違和亦勉出  
聽斷或中夜有機宜奏報未嘗不披衣而起朕非不知  
燕息自怡蓋所愛不在一身總為天下生靈計政事務  
求當理官職務在得人期於家給人足百姓樂業而已  
今吏鮮潔清之效民無康阜之休君臣之間全無功績  
可紀儻復上朕尊號加爾等官秩則徒有負媿何尊榮



之有至於

太皇太后

皇太后加上徽號詔赦天下理所宜然其上朕尊號之事斷不可行乃朕實意非粉飾之辭也自今以往大小臣工宜各洗心滌慮砥節厲行休養蒼黎培復元氣尔等可向九卿各官悉諭朕意不必再行陳請康熙二十年十二月十四日

諭議政王大臣

頃九卿等以逆首既除四方底定奏請上朕尊號朕思  
曩平南王尚可喜奏請回籍時折出票簽面議圖海言  
斷不可遷移朕以三藩俱握兵柄恐日久滋蔓馴致不  
測故決意撤回下議政王大臣九卿等官會議時未有  
言不可撤者皆以遵旨宜撤議奏朕意已定遂命遷移  
不圖吳三桂背恩反叛天下騷動偽檄一傳在在響應  
八年之間兵疲民困幸荷

上天眷佑

祖宗福庇逆賊遂爾蕩平儻復再延數年將若之何爾時惟有莫洛米思漢明珠蘇拜塞克德等言應遷移其餘竝未明言遷移吳三桂必致反叛向議此事之人至今尚多試言當日曾有謂吳三桂必反者否及吳三桂叛後各處擾亂多有退而非毀謂此事皆因遷移所致此等情事朕俱洞悉若彼時朕諉過於人將議應撤三藩者悉置於法諸人豈不死於非命耶朕素性不諉過臣下即今部院事務如有錯誤朕亦自任未嘗歸咎於

人朕自少時以三藩勢熾日滋不可不撤豈因吳三桂反叛遂諉過於人耶賴

天地

祖宗之靈剿滅逆賊方為此言儻逆賊不滅其過豈不盡歸朕身今雖賊亂削平地方寧靜而民困未甦瘡痍未起君臣宜各修省恤兵養民布宣教化務以廉潔為本共致太平若遂以為功德崇上尊稱濫邀恩賚是可恥也康熙二十年十二月十四日

諭大學士杜立德

卿弼亮老臣久任機密端醇恪恭勤慎素著茲海宇蕩  
平時當令序內殿賜宴廷臣念卿臥疾不克同此歡讌  
特遣中使慰問賜以醴饌卿其加餐珍攝以副朕惓惓  
至意特諭康熙二十一年正月十四日

諭禮部

比年以來逆賊吳三桂背恩反叛擾亂地方仰荷  
祖宗在天之靈默垂庇佑克奏蕩平應躬詣

山陵展祭以告成功前初聞捷音即謁

孝陵行禮茲奉

太皇太后慈諭

太祖

太宗山陵亦應親往祭告隨命議政王貝勒大臣等會議僉謂事關大典允宜舉行今擬即謁

太祖

太宗山陵虔申昭告用展孝思應行事宜及需用各項

著各該衙門速行脩辦爾部即遵諭行特諭康熙二十一年正月十七日

諭將軍安褚護

詳覽爾奏所言雖是但今雲南蕩平告成功之大典不便延進中止朕與廷臣公同酌議於二月十五日啓行已有定期此外別旨俱口諭費奏官員矣康熙二十一年二月初二日

諭烏喇將軍巴海等

今以雲南等處底定躬詣盛京告祭

三陵意欲於扈從人等餽養馬匹之暇觀看烏喇地方  
將軍應從何處帶領兵丁候迎可與盛京將軍定議行  
之再產鱣鯉等魚之處爾即詢明烏喇西特庫會同將  
須用諸物悉加脩辦完整為此特諭康熙二十一年二  
月十一日

諭學士張英

爾素性醇樸侍從有年朝夕講筵恪恭盡職茲因爾父



未葬具疏請假朕念人子至情忠孝皆出一理准假南  
還特賜白金五百兩表裏二十匹旣旌尔之勤勞兼資  
墓田之用尔其欽悉朕惓惓至意特諭康熙二十一年  
二月十四日

諭裕親王福全

相別以來忽復兼旬棣萼之思時在寤寐初四日已抵  
盛京山川形勢風土民情深維

祖宗開創之艱難令人遠想慨然春氣漸佳知意興甚

適也特此佈聞不宣康熙二十一年三月初五日

諭蘇大敦柱

茲上

太皇太后奏啟為切陳微衷仰祈

睿鑒事內云自山海關至盛京水土皆佳獸多魚鮮每當食頃輒念不能馳奉

太皇太后甚歉於懷到盛京後身親網獲鯉魚鱗魚設法成段浸以羊脂者一種鹽醃者一種星馳遞送心期

兩件奉到之日僅得味仍鮮美庶可稍見微誠山中野  
燒自落榛實及山核桃朝鮮所進柿餅松子白果栗子  
附候

安奏啓同往等語所進之物可同奏啓一併送至

慈寧宮其銀餅中所貯之魚到日鮮否明白奏知若

太皇太后欲寄製成棗脯即實之餅中封固付來為此  
特諭康熙二十一年三月初八日

諭戶刑二部

朕承

祖宗丕緒撫御區宇日以子育元元為念自逆賊吳三桂倡亂滇南多方煽動軍興八載中外騷騷仰賴

祖宗在天之靈默垂眷佑殄滅兇渠民生乂安疆圉底定爰特行徧祀

山陵之禮用告成功茲恭詣

福陵

昭陵謁祭禮竣惟盛京為國家肇基重地朕躬親幸宜

沛大澤以示殊恩山海關以外及寧古塔等處地方官吏軍民人等除十惡等真正死罪不赦外其餘已結未結一切死罪俱著減等發落軍流徒杖等犯悉准赦免奉天錦州二府屬康熙二十一年地丁正項錢糧著通行蠲豁其官役墊補包賠等項應追銀兩察果家產盡絕亦并豁免用稱朕加惠根本優恤黎民至意特諭康熙二十一年三月初八日

諭裕親王福全

頃覽來奏具悉念朕之懷茲者告祭事畢巡行疆土兼  
講春蒐正當草淺獸肥弓燥手柔之時且地多豺虎麋  
鹿此樂惜不與王共之也近狀想佳特此諮詢康熙二  
十一年三月十七日

諭裕親王福全

別來未幾麥氣迎秋荏苒流光良增思念每閱來疏足  
慰朕懷茲東巡典禮事事已畢經過之處無不喜見昇  
平二十日自盛京回鑾會面可期佈問不宣康熙二十

一年四月二十二日

諭敦柱蘇大

朕至渾河太子河遼河三河合流之處地名牛莊河水  
泛漲乘舟渡河扈從諸人以次待渡因暇舉網所得鯉  
魚五尾島子魚六尾鯉魚四尾鱗魚四尾鰻魚三十二  
尾鴨嘴魚六尾重唇魚二尾中魚三尾杆條魚一尾共  
六十三尾欲遣人賫往恐日久味變故著驛遞馳送尔  
二人將魚進

太皇太后兼奏明此意有何

慈諭併此魚到去新鮮與否於隨常奏啟內詳細奏來  
為此特諭康熙二十一年四月二十三日

諭刑部

頃以逆賊殲滅海宇蕩平朕躬詣盛京展謁

永陵

福陵

昭陵以告成功因而巡行邊塞咨詢民間疾苦東至烏



喇地方見其風氣嚴寒由內地發遣安插人犯水土不  
習難以資生念此輩雖干憲典但既經免死原欲令其  
生全若仍投畀窮荒終歸踣斃殊非法外寬宥之初念  
朕心深為不忍以後免死減等人犯俱著發往尚陽堡  
安插其應發尚陽堡人犯改發遼陽安插至於反叛案  
內應流人犯仍發烏喇地方令其當差不必與新披甲  
之人為奴以昭朕軫恤民隱哀矜保全之意爾部即遵  
諭行特諭康熙二十一年五月初九日

諭戶兵工三部

從前盛京看守

陵寢及山海關等城守章京員缺俱令其子弟頂補後  
停止此例悉由京師補授頃朕以昭告成功展謁

永陵

福陵

昭陵因周視所歷地方見道里遼遠往返艱難若章京  
員缺盡從京師補授則家口遷移重為貧窶者之累且

將前任章京房屋田地掣給新補之員以致前官孤孀無倚不能回京如欲即留彼地則田廬既空資生何策困苦日甚深用憫然嗣後盛京看守

陵寢及山海關等處城守章京員缺不必自京補授著於伊等子弟內令該將軍選擇賢能者具題引見頂補以免其往返遷移之苦儻伊等子弟無人堪用別有補授發往之員可另撥田房給與其前任章京田房仍行留給不必掣出令其孤孀得所尔三部會同詳議具奏

特諭康熙二十一年五月初十日



聖祖仁皇帝御製文集卷十二